

Uunga siunnersuut: Nunatsinni suliffeqarfiit namminersortut nutaat, aallartinneranniit sapinngisamik akileraarutitigut artukkorsorneqannginnissaat anguniarlugu, ukioq siuleq ataaseq akileraartannginnissamik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortat Siverth K. Heilmann aamma Gerhardt Petersen, Atassut)

Akissuteqaat

(Aningaasaqarnermut Nunamullu Namminermut Naalakkersuisoq)

Siullermeerneqarnera

Kalaallit Nunaanni ingerlatseqatigiiffinnik nutaanik aallartitsinissaq orniginarnerulissappat imaattariaqanngilaq ingerlatseqatigiiffiit akileraarutaasa appasinnerunissaat pingaarnarpaasoq. Pingaarutillit allarpassuit taassumatulli aalajangiisuutigippat. Tamakku ilaatigut tassaapput ilinniartitaanerup qaffasissusia, naleqqussarsinnaassuseq, attaveqarnermut tunngasut il.il.

Ingerlatseqatigiiffiit akileraarutaannik ukiumi siullermi akileraartitsisarunnaarneq, ingerlatseqatigiiffiit ukiumi siullermili sinneqartooruteqartussat aningaasarissaarnerunissaannik kinguneqartussaavoq.

Ingerlatseqatigiiffiit amerlasuut ukiumi aallartisarfimmini aallartisarnermut aningaasartuuterpassuaqartarput kaaviiartitarpassuaqartaratillu, tamannalu ilaatigut pissutigalugu ukiumi siullermi ikittuinnarnik sinneqartoortarlutik imaluunniit sinneqartuussanatik. Siunnersuut ingerlatseqatigiiffinnut taakkununga sunniuteqarnaviangilaq, taakkumi ingerlatseqatigiiffiit akileraarutaannik ikittuararsuarnik akiliisareerput akiliisaratilluunniit.

Ingerlatseqatigiiffiit akileraarutaannik ukiumi siullermi akileraartitsisarunnaarneq suliffeqarfinnut, ukiumi aallartiffimminili sinneqartooruteqarluarsinnaasunut soqutiginarnerussaaq. Ilaatigut eqqarsaatigineqarsinnaavoq inuussutissarsiummik namminersorlutik ingerlataqartut ingerlalluurtumik suliffeqarfiuteqareersut suliffeqarfiutertik ingerlatseqatigiiffinngortinniarsarilissagaat, tassa ukioq ”akileraaruteqarfiunngitsoq” atorluarniarlugu. Periarfissaq alla tassaavoq ingerlatseqatigiiffiit ingerlalluareersut suliffeqarfiumminnik allanngortitsinissamik

assigisaanilluunniit isumaliuteqalersinnaanerat, taamaaliornermikkut ukiumik akileraarfiunngitsumik atuiniarlutik.

Aaqqissuussinissaq aqukkuminaatsuusaaq, aaqqissuussaaneq kisiat eqqarsaatiginagu, aamali suliffeqarfinnik allannguinnisanut ingerlatseqatigiiffinnillu pilersitseqqinnissanut il.il. tunngatillugu. Taava aperisoqarsinnaavoq: Aaqqissuussineq qasseriarlugu atorneqarsinnaassava? - Aaqqissuussinissaq aamma allangortitsiniarnerni atorneqarsinnaassava, soorlu ingerlatseqatigiiffiup immikkoortunut marlunnut avinneratigut? – Ingerlatseqatigiiffik aaqqissuussinermik atuereersoq pilerseqqinneqarpat allangortinneqarpalluunnit ingerlatseqatigiiffimik nutaamik pilersitsisoqassaaq, taannalu aamma aaqqissuussinermi pineqartunut ilaalissaluni. Tassa imaappoq siunnersuutigineqartutuut allannguinnissaq atonerlunniarneqarsinnaavoq – atonerluisoqarsinnaaneratalu pinngitsoortinniarnerni allaffissornikkut nukippassuarnik atuisoqassaaq.

Ingerlatseqatigiiffiit akileraarutaannik ukiumi siullermi akileraartitsisarunnaarneq kommunit Namminersorlutillu Oqartussat isertitassamikkut annaasaqaatigissavaat, taakkulu allatigut isertitaqarnikkut allatigulluunniit sipaarniarnikkut matussuserniarneqassapput.

Namminersorlutik Oqartussat ingerlatseqatigiiffiit ataasiakkaat qanoq pisoqaatiginerinik paasissutissat tunngavigalugit akileraarutit pillugit paasissutissanik suliaqarsinnaanngillat, taamaattumik siunnersuutip isertitassatigut kinguneriunnagai oqaatigineqarsinnaanngillat.

Ingerlatseqatigiiffiit akileraarutaannik ukiumi siullermi akileraartitsisarunnaarnerup aningaasaliiumassuseqarnerulersitsinissaa ingerlatseqatigiiffinnillu nutaanik pilersitsinissap orniginarnerulernissaa Naalakkersuisut takussutissinneqarsorinngilaat.

Naalakkersuisulli akerlianik annilaanganartoqartippaat aaqqissuussinermik allaffissornikkut oqimaatsumik atonerluiniarsinnaaneq inuiaqatigiit ataatsimut isigalugit ajoqutaaginnassasoq.

Naalakkersuisut taama oqaaseqarlutik siunnersuutip itigartinneqarnissaa inassutigaat.